

太谷縣志總目

卷一

圖考

星野  
公署

疆域  
學宮

山河  
書院

城池  
十景

星野

疆域

附  
關隘  
津梁

卷二

沿革

山川

城池

附  
村堡  
岩墩  
營房

公署 附坊表

學校

壇廟 附寺觀

卷三

古蹟 附碑碣塚墓

水利

田賦 附鹽法

風俗 附土產

職官

名宦

卷四

科目

附鄉飲

仕籍

附封典

卷五

人物

分封  
篤行

功勛  
耆善

忠烈  
仙釋

宦蹟

儒林

列女

卷六

藝文上

御製 附明勅諭 疏 檄 序 記

卷七

藝文中 傳 墓誌

卷八

藝文下 墓表 附祭文 賦 詩

太谷縣志卷七

傳

國朝

名宦韓公小傳

邑令

王廷贊

三韓人

余下車聞父老稱前令韓公之德不衰因稽其實  
行而知所以見稱者有由也公名昌穀山東禹城  
人順治元年由進士蒞茲土訪邑中利弊知協濟  
徐溝同戈驛馬民以典籤爲苦及修學使公解歲  
困於役因力請上官協濟兩病遂除縣舊七十一

都兵火後名存實亡公併爲四十二賦役乃均其  
丁有死於兵者俱削其籍舊入櫃糧長分收諸里  
逋欠經年公令各收本里民始易於告竣至於除  
奸蠹吏畏其威保良善民懷其德興起學校每取  
課藝面爲甲乙如訓弟子陞任後猶留官俸令葺  
文廟蓋其德政大都如此谷人立祠祀之宜哉

名宦賈君小傳

王廷贊

古人云生死亦大矣苟非見義明決烏能致身不  
顧哉谷邑順治己丑有姜逆之變守道材官顧二

等降賊賺開城門擄邑令賊官李承培爲僞令後  
賊敗走承培夜遁撫軍委按察使照磨楊其籍署  
事命君協理焉賊黨田登奎等復引承培領賊百  
餘入城君被執罵賊不屈賊手刃之上官嘉其節  
祀於忠烈祠嗚呼人固有一死而輕於鴻毛一死  
而重於泰山者若人之死真泰山矣公名道醇蒲  
州人順治四年由拔貢秉鐸谷庠

王縣尉小傳

王廷贊

君王姓名自亮江南歙縣人順治初年授太谷縣

尉清廉公正不剝民以自肥民戴之如父母未幾  
順治己丑邑有姜逆之變是時干戈擾攘人皆苟  
免偷生君獨正襟危坐罵賊不屈遂與教諭賈君  
俱遇害夫官無大小在能盡其職王君一縣尉耳  
乃能舍生取義可與古之志士仁人爭烈矣

鄉賢韓君小傳

王廷贊

古之所謂鄉先生沒而可祭於社者惟韓公足當  
之矣公諱宗文字山斗聰穎異常讀書目數行下

蚤歲登賢書及闖寇竊據脇縉紳謁選公以目疾



辭堅不仕有托青盲避述之風

鼎興後念家貧親老始通籍校潞庠尋改沁州學正  
訓士嚴明有法後舉進士授推官未任而卒公生  
平孝友父年九十餘順志承顏色養備至有兄乏  
嗣凡衣服飲食必令豐潔不稍傷同氣心此其大  
節彰明較著者也其他嘉言懿行不可勝述

孝子牛萬青小傳

王廷贊

嘗考夫子之稱舜孝而知諸福之物可致之祥皆  
自大孝得之甚矣孝之重也谷邑牛公志遴梁平

里人少孤母撫養成立性至孝母病篤親嘗湯藥  
半載之中不解衣不如葷早夜焚香祝天祈減已  
算以代母儒學舉孝行上憲給匾以示旌云公字  
萬青廩貢生任臨縣教諭有子三長懋修登賢書  
次敏修郡庠廩生次靜修國學生諸孫林立能繼  
書香詎非至孝所感哉詩曰孝子不匱永錫爾類  
萬青之謂與

孝子姜大謨小傳

王廷贊

孝子姜姓名大謨邑之西南維人也家最貧日傭

於人計其所得之值爲其母甘旨之供順志承顏  
無怠無逆前縣陸嘗給額以示旌云自母之沒也  
日出則服勤於外夜至輒號泣隨之如是者踰年  
人皆以爲難余嘗見名門右族誦詩讀書之輩非  
不日養其親往往致飾於外而心之真誠懇摯者  
不存焉孰若大謨之艱難以致養養愈真貧苦而  
承歡歡益摯君子曰惟其真且摯也大謨之孝故  
足傳

廩生杜鳳麓小傳

教諭

黃

鑑

聞喜人

杜可柱字石臣人號爲鳳麓先生孤潔好義不妄  
交爲邑諸生喜讀書不爲章句學務求古聖賢所  
用心有志進取嘗縱談天下事已而樂道自適視  
功名富貴泊如也著海艇吟玩其語意有無入不  
自得之趣余秉鐸邑庠無問黃髮垂髫稱之弗絕  
夫先生沒而數十餘年不朽若是嗟乎世有斯人  
余不獲親炙之而沐其餘光也爲悵望者久之

處士杜蔭祁傳

武一韓

處士名亦衍字蔭祁鳳麓先生之子也生而沉靜

寡言笑飭步履人以國士目之應童子試嘗冠軍  
然數竒不偶父病求良醫不得不憚跋涉百里外  
師事郡城傅青主先生不期年盡得其秘揀方製  
劑尊人病體賴以保全者二十餘年鳳麓善飲而  
工詩凡有題咏輒爲步韻一家之中詩酒倡和甚  
樂也故所著情來草堪與其尊人海槎吟集並傳  
於世厥後父母歿處士襄大事凡一切殯葬悉如  
禮而貧窶日益甚故詩有摩挲罌內米斷續火中  
烟之句親友輩知其精於醫也每以懸壺相勸而

處士雅不欲以醫鳴一日偶讀范文正公傳有曰  
不得爲良相願爲良醫始設藥於肆遠市廛近沮  
洳危坐其中三冬不能具火見者比之歲寒松柏  
至晚年學益博養益邃而醫亦益精人有請勿論  
貧富悉往視之而貧者尤不受其直數十年如一  
日里人高其義於庚子歲舉鄉飲堅辭不就曰朝  
廷養老盛典也吾辱在泥塗曷敢抗禮長吏以煩  
僕僕起居乎性嗜酒家貧不能自釀嘗沽於市故  
其詩曰小童賒酒至先我一顏酡然自其尊人之

卒也飲輒不樂曰安能起吾父於九原如疇昔之  
詩酒倡和乎未及飲而淚已涔涔下矣雍正七年  
病卒卒之日囊空如洗其自號泥窮野人也固宜

孝廉孫公倬菴傳

杜首瀛

孫先生雲襄字天章號倬菴康熙丙子舉人世居  
縣東南隅自幼才思敏絕未弱冠補郡庠弟子員  
卽樹幟晉北長遊胡致如先生門潛心經學併肆  
力子史百家晚年尤精於周易融會貫通直探先  
後天之奧嘗言易兼理數自周程朱邵後罕有窺

其秘者往學者浸淫佛老尤不憚大聲疾呼力排異說至今賴之性最孝侍父母疾衣不解帶每夜焚香告天願減己算延親年外祖劉乏嗣奉養終身沒後春秋祭掃心傷母氏淚常漣漣下也爲人重然諾慎取予意興豪邁不屑屑治生人產至若課授生徒因材陶鑄不拘一格頭角嶄露者髫齡卽預器之邑自戊子辛卯來科第翩聯號爲文盛之地獲雋者半出其門一生老於場屋明經後始登賢書邑宰重其名諭意所親欲關白他事厚其



家爲艷然曰明府宜愛人以德奈何取阿堵物汚  
我也大丈夫豈受人憐者自是絕跡公門長吏希  
得覲面五上春闈數竒不遇年七十三壽終易簀  
之夕朗誦薛文清句曰七十年來無一事此心惟  
覺與天通可想其品矣有子曰芝邑名諸生孫有  
讓有訓有誼俱名噪藝林世其家學云

郭孝廉傳天並子士莪雙孝傳

進士

牛問仁

安邑人

余遊於太谷年最久每同人讌集談軼事因熟聞  
李滿庄郭先生父子人稱雙孝云先生諱鳳翥字

傅天康熙癸巳科舉人官吳橋令慈惠廉明政聲藉藉其事親色養昏定晨省出告反面事必稟命而行執親之喪哀毀骨立殯葬悉遵家禮於同氣友愛尤篤一錢尺布不以自私析產時人謂有薛包遺風焉子璋字士莪庚午恩貢生亦善體親意視膳問寢終身無倦容父病衣不解帶藥必手煎及大劇焚香告天願以身代歿後禁酒斷葷三年未嘗入內教兩弟同時入學余因憶安昌邑乘所載周隋間孝子紐因廬墓三年麻生合拱高丈

許冬夏常青有鳥棲其上因每號哭鳥卽悲鳴相應因死其子士雄亦廬墓側家有老槐樹忽枯及服闋還宅其樹復榮當時旌表其里曰累德余每過其祠輒低徊留之不忍去今郭氏父子其無愧吾鄉二紐也夫爰立傳以表之

德陽令柳公靜菴傳

孫廷益

先生姓柳氏諱淦字淵如號靜菴世居太谷之胡村賦性奇特讀書求實用不屑屑爲章句學弱冠遊庠雍甲辰登賢書屢上春官不第恬如也事

親至孝父寢疾籲天願以身代及卒哀毀幾絕屣  
禪猶餽粥焉居鄉樂行善凡橋梁水利暨邑中諸  
義舉無不竭力捐助爲衆人倡方未仕時值新例  
聘鄰省孝廉入闈分校己酉充河南同考官所薦  
拔皆一時名宿迨乾隆庚午部選四川綿州德陽  
令道經鷄頭關有廢員楊公某眷屬流落旅邸不  
能歸先生傾囊脫驂以贈一家感泣羅拜而去抵  
任後視民如子聽獄訟委曲勸諭不特三尺法不  
輕試卽盛怒亦未聞詈罵語民感戴之如父母焉

邑偶遭回祿延及鼓樓逼倉舍先生伏地拜禱焰  
旋滅咸以爲盛德之感云性坦直不阿權勢未期  
年卽告歸居林下不復出爲善益力值歲荒視村  
人之貧者日給米二合自秋迄春全活無數鄰有  
趙姓者賈遠方數年無耗歲饑妻衣食不能給族  
人曰曷逃生泣不應日夜悲號忽一日其夫寄書  
來封白鏹數金妻喜而泣自是無凍餒而羣議以  
息閱數月其夫歸語以故不解久之細詰鄰人始  
知先生假此以全其生而保其節也其施惠而不

求人知也類如是邑人欽其德兩舉鄉飲大賔先生與余大父交最篤余因知其梗概詳且悉先生往矣迄今猶令人感慕傳頌於勿衰云

懷安名宦武公坦菴傳

翰林院侍講

宋在詩

安邑人

公諱一韓字文起號坦菴世居太谷縣年七歲受學於祖名世太贈君拊其背曰此吾家讀書子也太贈君捐館父直心贈君貿易遼左賴母孔孺人教養成立年十二出就外傳習舉業屈其座人庚

辰歲試邑侯吳首拔之賦詩以贈督學于公復首

拔之丁酉登賢書丁未成進士己酉有奉文纂志  
之檄邑侯王延公秉筆三閱月而竣事人咸稱服  
辛亥謁選除直隸宣化府懷安令懷安衝邑也甫  
下車修理文廟舉行送學賓興鄉飲酒禮諸大典  
其鹽當商各陋規槩行革去又邑有楊木長柴之  
徭積年派民輸解大受其累公申請捐俸官買官  
解並立石示後累遂除署內日用之需悉依時給  
發未嘗纖毫虧值兩稅之征例有耗羨悉除之每  
冬月設粥廠賑老疾孤弱與道路饑寒者懷邑兩

次檄運張家口外駱駝廟兵豆一萬二千石公恐勞民招商承辦而懷邑父老若不知有軍需也者壬子宣化府喂養馬匹派運草十萬束羽檄頻催公曰督催太急不將病民乎盍將本縣驛馬草先墊運而令民陸續交納以補驛馬草之缺十一月奉督憲劉檄發通州倉米一千五百石紅朽霉爛令將所領米石三七搭放兵餉馬損夫工食公憫之時懷邑養軍需馬設法變通用米代料以飼馬而易新米以給兵夫兵夫皆便之甲寅秋雨雹懷



邑腰站等堡被災公捐賑冬三月口糧用米一百五十九石五堡人民始得安堵乙卯開印後公三請督憲出借倉穀六千五百石秋後令民平斛還倉吏胥毫無染指百姓喜相告曰吾邑改縣以來未聞借穀平收者有之自我公始又奉文減糶倉穀六千石設廠於懷左柴西而萬全縣隣近村庄皆來告糶公曰萬民亦吾民也悉與之民有因累而鬻女者公爲贖還聞之者感泣後因公罷官士民建祠奉祀又請入名宦垂不朽公家世寒素舌

耕餬口者三十年性情和平橫逆來未嘗與校及  
事關桑梓利害輒挺身爲之雖觸當事怒弗顧也  
居官五載愛民如子民亦戴公如父懷人常聚而  
語曰清官易真官難嗚呼如公者洵可謂猷爲守  
兼之者矣解組後邑侯王刊前纂志稿復延公續  
之自是鍵戶家居不與外事惟教子課孫與邑諸  
生論文講學蓋公學問淵博品行端方爲士林所  
矜式計前後成就後學甚多云余與公誼屬同譜  
知公最詳故標其梗槩而爲之傳

國子監學正孫公敬菴傳

內閣中書徐

昆  
臨汾人

先生諱莊字敬菴號欽若先世自有明遷谷邑世有隱德祖世新公生子二長天章前丙子孝廉次成章考授州司馬司馬公屢得祥夢而生先生先生賦質穎異七歲過目成誦從伯父授經史心領神悟若金在鎔以其緒餘習舉子業焱駭雲迅二藝成日不待午也受知鄒學使補博士弟子員已酉勵文宗考拔第一食廩餼舉優行當堂令一邑新進生拜而受業重其文兼重其品也先生卽於

是科舉於鄉先生力學不矜雕篆斧藻德範以孝  
爲先家庭色養亶亶忘劬父寢疾親調藥餌衣不  
解帶者九閱月父亡絕而復甦者三母郭孺人亟  
謂之曰爾無兄弟形單影隻滅性致毀何以爲孝  
乃食粥杖而起依依母前惟恐不得慈母意及母  
沒盡哀盡禮亦如之前後數十年間遠近佩其德  
以爲白華朱萼因心以盡其學問之純粹由陔蘭  
之眷依焉性嚴重律度自持行事光明俊偉自奉  
儉約而敦宗族周貧乏坦懷接物不分城府遇事

有仔肩邑中公舉必推先生爲領袖如修文廟一  
役先生捐貲以爲衆先有以飛語誣者經大憲會  
研據手錄簿籍出入玉潔冰清半塵不染庭訊之  
下卒乃同聲獎勵故當時服其諳練後宰立石紀  
其事焉嗚乎先生好義急公功難磨滅者不可勝  
紀斯事其一也生平求爲有用之學凡禮樂制度  
水利農田諸經濟無不講究條貫谷人士斗山是  
仰方拭目而待展其用廼性好恬退少壯時惟以  
承歡二老爲快乾隆乙巳載取卽用知縣撫軍鄂

公觀其丰格以爲才可大用屢促北上辭不就丁  
亥蒙

恩旨凡在七十以上截取舉人未經赴部者以對品京  
銜榮身

欽賜國子監學正異數也先生欣然自幸所遭晚精易  
理家食爲安遐邇丐序乞銘索誌徵記者皆思得  
先生一言以爲重而性慎密詩文稿多刪而不留  
今其家所存遺篇皆由鄉閭中誌銘錄出者故未  
成集後生踵門請業循循善誘如坐春風中門下

士遊泮食餼登甲第者不絕響而子與孫曾科第  
蟬聯椒聊未艾非先生之以孝德爲文章何以津  
逮之盛能如此兩舉鄉飲大賓以孫廷夔官虞部  
主事

覃恩

馳贈奉政大夫以孫廷萊太守秩

馳贈中憲大夫壽九十有一德配吳太恭人鴻案齊眉  
壽九十有四俱無疾而逝子孫蕃衍科名官爵詳  
家乘以德受福可謂全人也已

論曰子厚有言明以鑒之志以取之役用其道德之本舒布其五常之質先生有焉余於庚寅得奉先生杖履領其言論風采谷之人稱無異辭用能悉其始末茲同年友一峯侍御以辛丑名進士由水部擢豸繡當

堯舜世爲喉舌繩祖武以補先生所未足潛德發光乃逾嘆崇壯幽浚如山如淵也夫

忠烈陳公子儀傳

我眉  
令 劉 璐 汾陽人

自古功名富貴隨時泯滅獨忠孝大節垂芳不朽



蓋天地之正理與天地之精氣兩相凝合而民之秉彝好是懿德見者聞者莫不咨嗟慨慕相與傳述於無窮歷久而彌光也至其誠篤本於天性操養根於夙昔故其一時樹立足以感動人心扶植綱常而或無人爲之紀其詳使後之人得所考據以漸就淪沒則又見與聞者之過矣忠烈陳公諱聖矩字子儀太谷縣望族世多貴顯不具論公生三歲而孤兄聖範亦纔五歲太夫人撫養教訓漸長就外傳讀書不事訓詁而志篤於忠孝每遇古

人仗節等事輒掩卷太息久之居家與其兄相友  
愛壘篋無間處鄉黨愉愉然不見聲色而重義氣  
疏於財貨人皆愛稱之年十八歲入武庠留心韜  
略藝勇軼羣乾隆元年丙辰舉武孝廉己未成進  
士十六年拔取全省京塘十九年選授湖廣提標  
左營守備二十三年陞授永綏協標中軍都司任  
內兩護協印大得軍心三十二年遂陞授四川黎  
雅營遊擊甫到任卽奉調滇省出師事竣回營旋  
有金川之役矣金川之始事也因小金與沃日仇

爭而金川陰助之沃日告急阿制軍命公帶本標  
兵前往爲兩造講和時索諾朮包蠶食之志公逆  
知其不可而大憲已有執議只得遵所指授辦理  
而歸不數月而小金逆前命沃日再告急公帶本  
標兵三百名隨大軍進勦駐守堯磧後小金蕩平  
僧克薩逃匿官兵進勦金川調公於馬爾達防守  
實只留殘兵五十名三十八年六月初旬大將軍  
溫兵潰於昔嶺而馬爾達已先被圍公竭力拒守  
凡七日至六日家僕王金印戰沒賊來益衆軍卒

請棄營而退公諭之曰營中軍糧若干石火藥若干  
干勦棄之反以貺賊必盡焚乃可又諭曰本府受  
國恩不能勦賊去將何之計惟一死以報

君父耳爾等隨死無益各自逃生可也眾皆泣拜公乃  
復提刀向賊手刃數人身受十餘鎗度不能支則  
速回時惟有公之次子禮及軍吏陳帝瑤猶未去  
公急命架火整冠北向跪大呼曰臣力竭矣敢以  
死報顧謂禮女非官守宜乘此時與陳某速逃禮  
泣曰大人爲

國捐軀兒何敢偷生人世願殉父難於是父子同躍  
入烈炬而死死時年六十五禮年二十八陳帝瑤  
以事聞於今大將軍阿摺

奏駐守馬爾達遊擊陳聖矩被賊圍困死守自焚情  
形尤爲壯烈當另請恤

硃批恤典照例辦理

賜祭葬銀三百十六兩恤賞銀四百兩

特恩加贈一級以守備廕長孫德文公之建節金川始  
末如此入將軍之困於昔嶺也營中兵卒萬人

民夫

數萬聞賊輒相驚潰死節者雖衆多

爲賊追及

卒遇害卽或先以死自誓然未有從

容布置慷慨捐生如公者也觀其臨死數言生氣

凜凜且父子主僕同時赴難卽求之古人中可多

得與公爲人剛正而心厚於仁歷任二十年愛士

卒饑寒疾苦曲爲體察故所至得其心好施予尤

篤於朋友有緩急或解囊以贈或典衣以助無少

吝惜平生不務爲詞章而雅重文士同城府縣必

相得甚歡又喜談性理綱常及古今忠孝節義率

反覆不倦激昂踴躍見於詞色歷任以來累封武德將軍昭武大夫武翼大夫娶李氏繼娶杜氏文氏俱封淑人子四長泰早逝次禮隨公殉節次智次琬俱幼女七人孫一人德文公歿之次年其姪璣解餉來川將爲公挽靈車以歸而請作傳於余余不文然與公同鄉里又同官於蜀見公之大節如此而不爲詳記其實是則余之過也故謹紀之

陳禮並家僕王金印小傳

武鞏圖

余於遊擊陳公與其子其僕之殉難而竊嘆忠孝

節義萃於一門云陳公諱聖矩字子儀由己未科  
武進士歷任四川黎雅營遊擊乾隆三十八年大  
兵征剿小金川當事者檄公赴馬爾達駐守僅與  
孱卒五十名屢請不益維時公次子禮家僕王金  
印從焉初賊兵嘗試公悉力攻擊而退踰日賊眾  
擁至勢不能支凡火藥糧草公恐留以資寇縱火  
焚之卽與其子禮投火而死家僕王金印力戰死  
夫遊擊公居高爵享厚糈值事勢危急之秋義不  
容偷生苟活其死宜矣若其子可以不死其僕益



可以不死而乃慷慨捐軀竟同甘一死是遊擊公於國爲忠其子於父爲孝其僕於主爲義非皆天壤間烈丈夫而一死重於邱山者哉顧遊擊公之殉難載在國史久而不磨余恐其子其僕歷年既遠或至湮沒而弗彰也爰濡筆而爲之傳

平越太守孟公廉夫傳

王申 秦大士 江寧人

往予客津門往來鹽關渡口有名孟公橋居人言孟公爲轉運同知日所建並述公在官嘗有功德於民閱二十年庚寅予長男承恩分校薦士得孟

生淦才而有文乃公少子述公生平爲悉今公既歿不能無槩於中也公諱周衍字廉夫一字素臣山西太谷人也其先世牒系及行身孝友具載墓表誌銘君年三十餘以例貢授府同知當

憲廟綜覈名實逾格用人之會特命爲海運倉監督任滿授長蘆都轉運鹽同知人羨爲美官者也

陛見日以不克勝任辭

詔弗許莅任九年弊絕利舉遠近稱廉吏第一後遷貴州

平越府知府平越故繁於訟蠹屯蟻聚不可爬梳

公設法清釐積案盡結例有資宦橐者悉剷除之  
置義學荆養濟院建常平倉俾民之孝秀者有教  
而老幼廢疾鰥寡孤獨者有養維時一郡之內蒸  
然大治無何以勞得疾遂乞歸士民泣留之不得  
則爲生祠祝之歸後養空而游心無六鑿暇輒讀  
易以琴詠自娛尤精臨池今所鐫蘭亭及八柱評  
書諸帖藝林寶貴之先是公在平越時力籌時政  
有便民者不惜任勞怨必求見之行事偶以辨論  
亢直微忤上官意去任後吟致政大學士桂林陳

公爲言其共事天津日久知其良吏上官悔以書  
招之出而公堅臥東山自循初服如是者三十餘  
年其出處大節不苟如此子瀛湖北宜昌府知府  
告養在籍濼現任工部營繕司郎中皆有能聲淦  
歲貢生卽予門下士也

論曰以公之才使當大任當有厚澤被生民垂不  
朽者卽久於平越其所設施亦當不止是乃引疾  
遽歸遂不再出自牽絲至懸車僅十餘載而公竟  
以林泉老矣然其辭榮抽簪急流勇退雖與古人

比操可也

香河令任公曦圃傳

進士  
岳廷元

清源人

先生姓任氏諱琚字佩中號曦圃始祖諱武者前明襄垣縣知縣遷太谷任村遂家焉歷十四傳而至封君養民公養民公生丈夫子四先生其仲也幼卽端亮如成人十七歲補弟子員次年旋食廩餼弱冠後南遊武林受業於杭堇浦先生之門一見卽深契之曰人才豈殊南北觀子文如掌上舞如屏風上行雖馬章民韓元少諸前輩不啻也堇

浦先生故曠達講課之暇不修邊幅而先生獨循  
循禮法未嘗苟笑語旣南歸聞見益博學益進壬  
申登賢書甲戌成進士以二甲歸班旋里奉色養  
授生徒閉戶披吟恬如也甲申謁選得順天香河  
縣香邑旗民雜處連歲被災又差務旁午民苦之  
先生下車專務與民休息勤農桑舉賓興省徭役  
舖戶不擾案牘不煩民戴之如慈父時久旱蝗螟  
四起先生禱於神曰是地人民屢遭饑饉不堪再  
困官有不德宜罰其身是夕風雨驟至蝗竟去人

擬諸中牟之異焉越二年丁外艱適以辦本蘭車  
事呈吏議歸之日士民扶老攜幼道旁涕泣者幾  
千百人數十里不絕嗚呼先生旣罷職非有餘勢  
以懼民民亦無後望以覬官而依依不舍如是則  
其爲政可知也歸籍後家徒四壁惟以逮事母爲  
幸設帳授徒恬然自得四方從遊者屢滿戶外二  
十年來知名之士掇巍科取高第者指不勝屈僉  
曰曦圃先生弟子也先生教人以六經爲根柢而  
旁及乎史漢唐宋以求其博咀味乎先儒語錄以

求其精平居抑抑自下見人小善輒曰吾弗如雖  
遇臧獲輩未嘗有疾言遽色而立身行已矩矱必  
嚴故游其門者如飲醇醪坐春風又如登泰華巔  
頭不敢作下界塵俗想焉丁內艱哀毀骨立遂至  
嘔血已酉庚戌病日劇猶手一編如素已而痛以  
季弟歿哭失聲竟不起壽七十歲

明經通方武君小傳

要蘭若

先生姓武氏諱世達通方其字也生而穎異讀書  
必求心得甫弱冠補博士弟子員益潛心經學銳



意進取顧數竒不偶屢困棘圍遂援例貢成均然  
非其志也性孝友父年八十而養志承顏孺慕愈  
篤旣寢疾湯藥親嘗衣不解帶及沒哀毀骨立杖  
而後起一切殯葬皆以禮有兄早逝遺孤姪撫之  
一如己子數十年融融無間言嘗設帳授生徒循  
循善誘先德行而後文藝一以古人爲楷式故遊  
其門者多所成立其他重然諾慎取予彰彰於閩  
黨戚友間者尤不可殫述余不獲沐先生教曾與  
其嗣君龍圖龍棟遊盖二君皆端慤士克繼先生

之家聲者也因撮數端以紀其梗概云

文學武君濬明小傳

趙德輿

事苟可以風世勵俗爲人之所不易爲者卽皆不容沒夫婦人從一而終義也丈夫喪偶而不續配獨非義乎然志乘所載貞媛烈女連篇累牘而男子之事未之及焉豈節義之大責之女子獨重與抑士有百行不必以區區一節表見與是不盡然吾邑濬明武先生郡增生也敦氣誼尚志節娶高氏伉儷甚篤生二女一子而高早喪時先生年猶

未壯也遂誓不再娶又家不中貲舌耕爲業出則授徒入則撫孤迨子女皆成立委以家政先生遂獨臥芸窓優游講學蓋始終三十餘載至於易簣而志不渝嗚乎世俗溺情枕簟坏土未乾旋歌燕爾甚至家人睽隔骨肉乖離變故之生胥於牀第故事有相習於固然而行道爲之歎息者往往而是也先生獨能返情禁欲爲人之所不易爲寸心絕繫累之緣一室享天倫之樂斯豈徒以一節表見者哉卽以一節論而其事亦已難矣先生諱作

哲字濬明子名渭濱早歲遊庠序克承先業是亦  
先生之義有以貽之也夫

高明縣令李公立堂傳

籍廷璋

李公諱植字立堂水秀村人戊子舉人已丑進士  
少聰穎讀書目數行下爲制藝詩古文辭踔厲風  
發然性沉靜所著作一以經史爲根柢搜疑考闕  
手不停披逮登第後燈火一編如故也謁選得廣  
東高明縣知縣至則興利剔弊蠹吏畏其威良民  
懷其德歲大旱投牒禱雨甘雨立降人以爲惠政

之應焉每朔望視學進諸生立堂上親授講解以振士風旣而以勞瘁卒於官靈車回里之日士民痛哭致祭者塞路人以比之巴東之竹其後邑人追思立祠以祀如文翁高朕云

煥然楊公傳

孝廉

曹之讓

遼州人

煥然楊公諱玠陽邑達士也其性情真摯歷窮達險夷而不改其轍雖求之古人中風規不多概見焉方公少時魁梧竒偉意氣不凡識者以關西瑞鳳擬之然家號素封恐以膏梁易所守而乃克自

振拔不與俗儕甫七歲怙恃交失一切執袴卑鄙之習不至入胸臆其天性然也歷長友愛克敦惠周閭里凡所營謀皆向光明磊落中別具眼孔亦不與諸子姪輩屑屑計貲產故四方之賢豪長者咸樂交而器重之客滿座上酒實杯中傲之北海季倫不且風高千古耶其後運會不齊盤錯多端雖名震一時而猜嫌危疑之跡間亦不免他人方昨舌驚心而公處之泰然一若行所無事卒之群疑冰釋援例爲兩淮鹽使易曰維心亨行有尚

堪爲楊公許焉蒞任之後辦務精勤庶績咸理一時清風甘雨之聲譽彰上下卽屢蒙上憲差委而公帑辦納外別無蓄積真所謂公爾忘私國爾忘家者哉厥後例陞知縣赴銓曹方期宏展經濟而數竒不偶卒於京邸太史范公聞而贈之曰鴻達子蓋惜其才之未竟而榮名赫奕固無慚於羽儀王國也夫守正者嫉邪多財者積怨孰如公之尊賢而服衆折足覆其餽棟撓鄰於凶孰如公之名顯而身安然則公誠不可及而後聞公風化者亦

大名縣志 卷一  
三  
可以自勵矣余籍隸箕州雖生不同里然得與公  
稔交二十五六年緬其人思其績於鳳山象水下  
蓋不勝慷慨悲歌云

白君夢兆小傳

杜靈鍾

白君長庚字夢兆郭里人也父卒時羣弟皆幼君  
篤姜被之誼一室共臥起撫育備至延四方名士  
爲之師每風雨一燈吟聲朗朗率相伴至夜分遇  
疑義輒爲剖析以故仲叔俱得學成遊黌序性豁  
達與人交不立城府好施予稍贏餘卽以濟人康



熙六十年歲饑出穀數百石賑貧者一鄉之中賴以全活甚衆鄉故僻壤子弟多失學君慮之爲立義學聚之讀書給紙筆其貧無貲者並給以薪水一時翕然來就學者將百人邑令某造其廬歎息高誼書額以贈焉年五十餘而卒村人聞之皆爲流涕

白君凝采小傳

杜靈鍾

白君萃亨字凝采邑之郭里人性純孝弱冠喪父哀毀骨立事母以孝聞祖父疾衣不解帶者數月

及卒君以長孫承重盡哀盡禮一如喪父時期年  
不食菜果終喪未嘗飲酒食肉夫居喪之制載在  
典禮士大夫口能言之而踐而行之者實鮮况凝  
采終老一鄉名不振於交游者耶嗚呼難矣以其  
居父喪有然廼居其祖之喪而亦然抑更難矣至  
今一村稱孝子者必爲首屈之有以夫有以夫君  
喜讀書務明大義不屑屑爲詞章之學至其樂善  
好施見義必爲藉藉在人口蓋深厚醇篤其天性  
然也卒僅年五十餘鄉人惜之

義俠石鎮宇傳

附

石鎮宇名蒞咸太谷固庄人也少負氣節慷慨好  
施遇人急難捐軀赴之流賊從沁源山口出犯其  
地鎮宇被執諸賊羅坐擁鎮宇前賊曰壯士也能  
從我解爾縛鎮宇曰家世清白不敢從又言以五  
百金贖則放還鎮宇曰家貧安得此賊怒拆屋椽  
燒紅向兩脅炙之自度不能生矣有鄉人陷賊中  
者達至其家以二百金往贖賊見鎮宇垂斃可之  
比贖歸下體已炙熟矣鎮宇豪壯勉啖酒肉竟得

全逾年復故擒賊之心未嘗一刻置也糾山鄉數  
百里諸村共偵之遇有風聲各山頭舉火爲號越  
兩載賊復來犯不知鎮宇已有備也賊中其伏斬  
獲千餘生擒五百餘以斬級十顆掛生擒者之項  
解上報功撫軍宋公統殷嘆曰秦晉兗豫諸要地  
若得此義勇數輩何憂流賊哉大獎賞之自後賊  
不敢再經其地甲申闖逆下晉逮繫諸縉紳解西  
安魏榆桑公芸至聞喜小水頭脫走解役報僞官  
檄邑責比家屬桑公潛匿月餘事少緩將越嶺歸

里過鎮宇所居地山民疑是逃賊奪驢搜資執詣  
鎮宇鎮宇素未相識但見其人有異止勿犯禮而  
問之桑公告以實問失物否曰路費二十金鎮宇  
使山民還之桑公後歷廣東右布政使余亦嘗避  
亂鎮宇庄服其義氣沉雄以詩贈之云季世人多  
險君何揭肺肝片言天日永半面弟兄歡心合千  
金易情違一笑難采風徵義士莫作孟嘗觀嗚呼  
如石公者亦人傑矣哉

見原李耳載

胡慈節母小傳

傳山

陽曲人

胡慈節母者太谷胡生衍虞之母也其慈與節奈何當闖賊之敗於燕道太原而西太谷之人城守賊攻而屠之母畏辱遽欲雉經侍兒十月者曰垣外有苦廢井不如投之卽死無苦母卽頷兒趨投井會旱井泥得不沒賊過睨苦亂下石中兒肩母恐石再下中兒身護兒心祝曰旣不沒天或不絕胡氏願兒無啼兒以驚怖未蘇果不啼賊乃去十月夜半裹殘餅馬豆擲井中未知母若兒之存否也母知爲十月仰謂曰與辱寧饑幸無再爲賊

賊既退姑李年老以墜樓脫脛獲免問諸十月十月日在井出之井母不傷顛隕兒亦無恙而胡生之父顧不知所在也族之長利其田廬諷之再適母不應而讓之田廬未厭復貸於母母有藏冠冠金也質冠子錢家與之貸曰金不兒值也委曲周護二十餘年畢成胡生衍虞爲今貢士衍虞者卽其所禰投井兒也胡生之父或曰被害或曰賊執而西也其母至今若夫子之在而或歸未亡人如非未亡人也是其慈也者是其節也者母車姓邑

舊家子嗇廬子曰婦人死忿易死辱難誼屬年姪  
聞孺人之懿行詳且悉故略傳其梗概云

杜母李孺人傳

郭清

李太君者約夫杜先生繼配也先生諱博積學能  
文雅爲士林矜式太君年十七于歸躬操井臼艱  
苦備嘗且善體先生事母意以事姑姑病篤藥必  
親嘗終夜衣不解帶者數月蓋賢而且孝如此先  
是先生元配王太君遺孤蚤世太君撫如已出一  
切飲食衣服不肯少傷子女心嗣值先生捐館太



君攀號哭泣慟不欲生奈諸子孳孳在疚未獲成  
立姑誓心作未亡人曩時門戶凋蕭日用膏火不  
給孤兒中所稱草草曉事者長冠瀛次甲瀛耳然  
以迫於糊口時恨不暇接讀父書爲病至元瀛先  
瀛首瀛輩年當弱齒甚或呱呱未脫襁褓中太君  
痛憂書香失繼督令尋師受學教以義方每夜懸  
燈紡績趣諸兒環坐攻書稍倦輒厲聲叱之曰汝  
父勤學一生數竒未遇汝曹若不潛心苦讀出人  
頭地不但廢棄先業且終身何以自立後三子鱗

次遊庠鞭策益篤甲午先瀛領鄉薦辛丑捷南宮  
成進士癸卯首瀛領鄉薦第一太君中堂拜見喜  
不忘規曰科名始階耳他日居官務盡忠竭力上  
報

朝廷慎勿取錢肥已吾不願享溫飽願汝曹爲清白  
吏足矣至今子孫奉爲寶訓暨卒遺囑喪葬從儉  
切不可效世俗作浮屠事婢某亦遣歸而家貪財  
妾賣我先人所痛惡不爲者人咸稱女中丈夫云  
太君系出咸陽廼舊家子守孀操三十載卒年六

十有八以子貴贈孺人

程母孟孺人傳

孝廉

唐

淵

錢塘人

孺人孟氏封君還初季女也性孝友幼稟異質喜

讀書授孝經論語及內則列女傳諸書數過卽成

誦稍長聞其弟巖讀他經史輒闇記能舉其大義

年十七適同邑程處士瓚爲妻間歲生一子進德

卽今考授徵仕郎州判者也進德生二歲處士以

病卒易簀前一夕姆抱進德立側處士指以相語

曰吾病殆不起今以此子累汝且曰吾上有二親

不能養生送死此遺恨也汝其爲我成之孺人雪涕唯唯處士言訖而逝孺人時年十有九也陽邑程氏自徽徙居傳十世世守耕讀家固貧處士歿後孺人慨然以養老撫孤爲己任日瘁女紅以供甘旨承歡色笑舅姑怡然忘老並不覺膝下之喪子也逮舅姑歿後致哀盡禮酸感路人至今邑中稱孝婦者皆推孺人云尤善持家以勤以儉井然有法其教子特嚴肅朝夕督課不啻斷機進德天性忠厚事母最孝比旣長不忍母氏勞苦一朝棄

儒業習陶白之術生計至此漸豐而孺人亦稍稍  
息肩矣中年以父喪明繼母呂亦得風疾遂移居  
城內就養躬奉湯藥二人天年終乃已晚年長孫  
健次孫度俱出就外傳通人事孺人輒訓之曰汝  
家世業儒汝父以我故廢學汝等其成乃父志以  
延先業自是健等遂發憤下帷名噪膠庠嶄然見  
頭角今諸孫繁衍同爨數十口循循有矩皆遵孺  
人教也孺人以壽終卒時年六十九距初孀時已  
五十年矣雍正十三年夏以子進德授職例贈孺

人今

天子卽位之元年循例入節孝祠歲時俎豆孺人亦可  
含笑九原矣然一生大節雖赫然在人耳目而嘉  
言懿行傳誦人口者不能久而不滅也余不揣固  
陋撰次其事以俟觀風者採錄而傳諸無窮焉

貞烈婦小傳

武一韓

烈婦侯睿女年十七歸貞伍智越三年生男又二  
年生女依依者娛膝下矣乃年方廿六遽失所天  
卽欲從夫地下念貞氏宗脈遂矢志存孤甘作未

亡人詎昊天不弔甫及半載子女偕亡烈婦於女  
死之次日歸母家哽咽不語旋反謂娣姒曰姑老  
矣生事死葬幸有叔輩可託娣姒亦不解其意卽  
於是夜雉經時雍正十二年三月八日也此其浩  
然之氣不拔之操真足震動天地噴薄風霆感泣  
鬼神烈婦之死而不死者固將亘宇宙而長存矣  
古稱烈女與忠臣並然爲忠臣者或以氣質勝或  
以學問勝要皆知天壤間有忠義名節之可慕故  
成就卓犖如此若烈婦孱然一女子耳生長閨閣

九谷縣志 卷一  
目不知書顧能磊磊落落直行已志視千古忠臣  
義士似爲過之縣尹旣採入邑乘余復爲立傳他  
日秉國史之筆者當有取於此也

武太君慈節小傳

武一韓

武太君者邑逸民楊應成妻也年十六于歸舅姑  
早世太君親操井臼織紵爲饗殮計雖艱辛備歷  
而太君視之裕如也年二十九歲生二子遽失所  
天宗人逼以改適太君泣曰吾不遽從夫君泉壤  
者欲撫兩孤成立以延楊氏宗脈耳今迫我願以



死誓宗人乃止自是撫養啾喚心力俱瘁每遇子有疾痛卽寢不安眠空乏時或凍餒自受不令子有饑寒平居訓誨尤勤嘗語其子曰自吾爲楊家婦貧苦吾所自甘倘異日幸邀天眷汝輩各自成立不致里人非笑足矣後長子春光頗自成立不愧鄉里善人次子春輝孝友可風獲舉鄉飲未必非太君之教誨有方抑亦天之報施不爽也嗟乎以斃獨無依之嫠婦賴其紀衣食持門戶幾不堪獨任其勞矣更能訓子成人克承夫祚何怪里人

傳爲美談閨門之內聞而興感者比比也太君享年九十有三邑令司馬公嘗給匾示旌余又傳其節略俟觀風者採擇焉

胡孝烈婦小傳

張天澤

榆次人

孝烈婦者姓侯氏太谷人年十六適胡世武爲妻篤孝舅姑克稱婦職歸未及三載世武以疾不諱氏泣血無休水漿都不入口願以死誓人或勸之曰以死殉烈何如以節盡孝婦唯唯含淚從之時屆小祥翁姑以氏無所出欲奪其志氏不敢面拒

給以服滿爲期三年中除操井臼外卽密室沾襟  
未嘗與人共笑談服滿日翁姑仍以前言相屬氏  
泣曰吾不殉夫地下者徒以兩老人在也必欲改  
適吾何以覩顏再生遂往拜夫墓歸卽嘔血數升  
於是晚縊於寢時年二十一歲鄉里聞之莫不悲  
哀出涕曰是胡氏之孝婦而終以死殉其夫也竊  
歎女子無行改轍中途何可勝數間有守共姜之  
義白首完貞者或因兒女情牽眷戀家計耳孰若  
是之少年矢志百折不回毅然視死如歸哉方今

聖天子表節旌貞氏必邀其

盛典亦何事砌蕪詞以發潛德第聞此奇行慷慨激昂

不禁津津樂道云

節孝武母孔孺人傳

內閣學士王承堯  
沁水人

孺人姓孔氏贈君直心年伯之配丁未同榜文起  
年兄之母也生而穎慧端莊靜一從無疾言無厲  
色事事皆中規矩年十九于歸奉舅姑以敬相夫  
子以禮宗黨間競以賢婦稱未幾而姑杜太孺人  
見背遺少子幼女孺人撫養之衣服飲食無異太

孺人在生日孺人性至孝父文經公筮仕遼東有

母楊太君在堂雲山萬里音問難通太君或缺於

供孺人悉出其簪珥衣物以爲饗殮費其慷慨蓋

天性然也贈君直心公嘗貿易遼左染病而卒訃

至孺人痛絕方甦因撫子而泣曰天禍我家值此

窮凶吾非不能從汝父於地下顧茲孱弱旣失怙

復失恃零丁孤苦其能苟延旦夕乎因忍死守貞

早作夜思服勤不倦或漏下至夜分猶聞機杼刀

尺聲且嚴於訓子稍有過舉輒加箠楚雖慈母哉

儼若巖君焉嗚呼孺人之志益堅孺人之身益瘁  
矣卒年四十有四以子貴贈孺人孫枝競秀皆頭  
角崢嶸非孺人之苦節不致此余於孺人誼屬年  
姪聞孺人之懿行詳且悉故略傳其梗概云

孟節母傳

武先慎

節母者貢生孟之陳之女適余叔祖令先公性貞  
靜事上逮下克盡婦道公歿慟不欲生念子謨尚  
在襁褓孱弱息宗祀攸關遂矢志撫孤時年二  
十有七也余聞其靜掩霜扉勤女紅一粒一絲珍

同珠玉而藐孤所需日費金錢不惜保護周詳三十三年如一日迨目覩其成且生子始歎其夫之宗祧不斬也悲喜交集無病而卒年六十嗟乎夫死守志古今同慨爲人子者陳之當事具章以

聞建坊入祠馨香俎豆死而有知含笑九原矣乃後人念不及此遂致高風亮節湮沒弗彰此一憾事也故爲立傳以表之

杜母曹孺人節孝小傳

郝依京

曹孺人者曹公孟可之女杜公我玉之元配

勅封修職郎渾源州學正杜公樹庸之母也貞靜性成  
幼嫻女訓十七歲于歸必敬必戒四德備焉越二  
載翁沒越五載夫亡矢志靡他擇姪爲嗣歷三十  
餘年母慈子孝其樂融融娣姒四人而事姑始終  
盡禮能得歡心者惟孺人爲最節孝兩全年五十  
八歲而卒古曹娥之遺風殆未艾也易曰婦人貞  
吉從一而終孺人有焉詩曰惟酒食是儀無父母  
貽罹孺人有焉

陳母孟孺人傳

武先振



孺人邑庠生孟公瓌女生而誠樸寡言笑喜讀孝  
經論語暨曹大家女訓諸書及笄歸聖謨陳公克  
敦婦道姑胡氏年老患痿痺疾嘗藥侍食扶持不  
倦三年如一日姑病將革聚家人而命之曰微孝  
婦力余不能延殘喘以至今日爾輩宜敬禮之既  
而胡氏兄弟來唁聞遺命率子弟環跪強拜族戚  
無少長從而拜之者盈堂也先是孺人未歸時父  
病癱瘓偃臥幾四年惟孺人伺左右始克欣慰蓋  
其善體親心意曲而中殆性成然嗣是聖謨公亦

善病前後十餘載支離已極而孺人委折調護卒使康強逢吉壽至六十有九其一生大節無虧也如此至於任中饋嫻女紅慈幼睦嫻又其餘也丁未歲邑侯李公聞而嘉之給以匾額鄉人榮之年八十有三無疾終子四珏玢璵江女三諸孫曾十有六洪範曰五福庶幾有焉孺人爲余外祖母故稔之詳不揣鄙拙而爲之傳

石門雙節傳

孫廷益

節婦郭氏邑人石生毅之妻年二十四歲夫死子

安卿纔三歲矢志守節安卿長以貧故棄儒業賈  
娶陳氏逾年生子充美又二年而安卿以積勞死  
時陳氏方二十一歲誓以身殉絕食三日郭氏慰  
之曰我苦守藐孤爲延祀計也不期中道若此如  
與若俱死固其所然猶有孤孫在苟撫之成立而  
夫有子而翁有孫地下人瞑目未亡人亦可無愧  
徒死無益也陳氏意悟侍其姑又撫其子然飲泣  
傷心而一目已眇矣充美旣入學頗聰慧詎無何  
而充美又殤姑婦相抱痛憤絕而復蘇而陳氏兩

目遂皆瞽焉乃邀族戚繼清杰爲安卿子陳氏撫之如己出今郭氏年七十有三陳氏年五十有二生計日益窘陳佐姑紡織尚能以手代目也賢哉郭氏孝哉陳氏洵可風也

張氏慈節小傳

郝依京

張氏者楊公善承之妾也所出微而賦性婉淑自安婢妾之分嫡有時待之不以禮恬然不爲意居二歲無所出而楊公遂亡閱一月而其嫡亦亡嫡遺子女三女長者未盈五尺幼者僅四齡子則猶

在襁褓也氏時方二十一歲自誓撫孤無異志始其家所遺尚足自給繼以子幼荒散殆盡而氏日則針黹夜則紡績竭其所得爲日用之需已或不舉火而子女衣食無缺如是者二十餘年卒嫁其女爲子娶婦子亦能自力率婦奉養盡禮族黨咸以爲慈節之報焉顧以勞勩過甚甫逾五十染痼疾死時二女已先亡子適趨食在外唯子婦侍疾婦質簪珥延醫藥氏却之曰余當時不卽從爾舅姑於地下者凡爲楊氏一綫計爾今已弄孫復何

用此爲數日逝余觀一統志所載慈節累百而出  
於小星者僅三五人然如周氏之終事舅姑尚有  
已子可守鄧婦之撫子成立猶有貲財可憑以彼  
况此不更有難焉者乎爰撮其梗概而爲之傳云

節孝郭母成太君傳

解元

趙謙尊

榆次人

太君姓成氏太學生郭君琬之室也幼嫻內則工  
組紉家人咸稱譽之于歸時姑已逝舅與繼姑在  
堂奉侍以孝聞鴻案相莊閨門之內肅如也年二  
十四而太學君遽歿遺孤傳薪僅二歲簷衰棟薄

雨暗風吹總帳一燈呱呱在側太君撫棺而慟曰  
未亡人若相從於九原則是藐孤將不保且白髮  
桑榆諸弟皆幼弱誰歟供朝夕承菽水者吾不敢  
以一死畢吾事今而後吾其以郭氏之婦爲郭氏  
子以郭氏之母爲郭氏父庶報死者於地下乎於  
是強起治家事克儉克勤甘旨罔缺舅姑疾視藥  
餌必嘗以進居舅姑喪盡哀盡禮叔季之間辨而  
有恩子成立家亦漸豐然以侍舅疾得勞嗽症積  
不治營葬之後數年遂歿蓋茹荼集蓼者三十八

年矣太君性嚴而慧以父爲諸生早從受讀史漢諸書略能上口嫠後絕口不言曰文辭非婦人事也嗚呼以太君之明大義立大節其亦深於詩書之氣者歟乾隆五十八年奉

旨建坊旌表入祀節孝祠云

郭門雙節傳

郭 瑛

人家不幸有節婦尤不幸有雙節婦非輕言節也以人生子子復生子孫復生孫分之千枝傳之百世夫貴而有



誥命婦夫賤而有糟糠婦百年偕老何必定以節顯如  
吾門貞氏王氏者然其功成名立又無不謂

熙朝風化所被雖婦人女子咸知節義能使一門娣  
姒亭亭並峙在昔吾叔父候選州同

誥贈朝議大夫鳴庭公配吾叔母

誥贈恭人溫氏生五子名之曰琮曰琦曰瑄曰瑚曰璉  
森然蔚起競秀連鑣可與燕山竇後先輝映人誦  
丹桂歌以爲靈椿賀固一時盛事也鳴庭公捐館  
後歲丁丑瑄亡時貞氏年十九歲無嗣欲以身殉

姑溫朝夕曲諭嗣姪恢緒教養至十七歲娶妻育女恢緒陡歿妻女繼亡貞氏前苦成空而環顧同堂又猝無可續心愈傷矣操益烈焉更歷十一年嗣姪孫崇善爲孫屢經挫折刻志存祀其冰雪心肝深明從一之義而以未亡人補天也至今三十年歲庚辰瑚亡時王氏年二十一歲五內崩裂飲食不入姑溫指孤子惠吉勸曰盡節易守孤難王氏乃飲泣日褓兒望其成立不料四歲痘亡嗣姪廸吉亦亡常祝天增姪子早得續嗣又越六年

璉以子周緒嗣之王氏靜處中閨奉姑教子絕去膏沐非懿親不覲面至今三十年二氏者柏舟矢志共以孀而事孀井水無移同一嗣而再嗣當其手足連折凜凜烈烈勵節不磨定省則慈闈隱痛議嗣則伯叔含悲且此得撫孤而彼傷艱嗣彼方立後而此又思兒至老姑垂危伯氏不起而二氏之守日正長王氏續子之苦衷不能不盡移於琦與璉琦歿而貞氏嗣孫之愁腸又不能不專注於璉也嗟乎二氏遭際之艱數十年來使一家骨肉

會不得一日而安焉而二氏之節始全此所謂家有雙節尤家之不幸也仰承我

皇上矜恤孤寡有守節合例者歲飭各官詳報樹坊入祠祀二氏會逢

盛典由學校舉於邑侯顧公公詳之憲咨於部奉

旨建坊旌獎以彰節孝親友登堂致賀二氏謝曰我兩

人不卽從夫於地下者以姑訓在耳故不敢逞一

時之烈輕丈夫之嗣以增高堂憂苟延人世久矣

敢以叨蒙

聖恩爲賀耶其色莊而嚴其辭大而切其情惻惻然實  
有不堪回憶者賀者皆曰二氏德同金玉操挾冰  
霜雙雙樹幟於巾幗間且識大體其女中君子哉  
更可喜者周緒崇善材力偉健儼如鵠峙鸞停以  
之承先而啟後所以償二氏之艱苦者當未有艾  
也夫以兩人之操仍全五枝芳桂則雖不幸於一  
時而實有功於百世際

皇恩之特降覩彤管之揚輝不特璉遂所願合族與有

榮焉瑛嘗讀書勉爲文章爰具稿以傳其巔末



墓誌

元

李壽之墓誌

太原路儒學教授

李之芳

文陽人

李君昌慶字壽之其太父達以金正隆二年應詞賦舉中甲科爲寧化軍司使以廉能稱秩滿授朝列大夫石州寧化縣丞卒於官祖母王氏生君父敏修精勤儒術書法高妙大定間以世爵授將仕佐郎嵐州都目明昌五年就選擢亞魁遷儒林郎錄河中府事以政績聞時張萬公爲府尹命書鶴

雀樓額及戒百官銘於公廨之壁大奇賞之未幾  
萬公拜叅知政事薦於朝加奉訓大夫遷祁縣尹  
深有惠政累官至河南府治中終於官廨初娶溫  
氏生君性嚴肅舉止有則承父爵授宣德郎監文  
水縣酒復加本縣義軍千戶歷河南府酒稅使及  
陝州倉使後挈家北歸以本縣學官隱居教授生  
徒常以百數其養成人材及入仕版者多出其門  
歲己亥以府缺復其家君識時達變日與士大夫  
相從詩酒優游卒歲可謂善處世者矣君生於丁



未歲十一月五日終於甲寅歲六月十有六日妻  
姬氏賦性溫厚克勤家事睦親善鄰以庚戌年六  
月十有六日生至元庚午三月十二日卒享年八  
十有一子曰鼎新字子革爲人和易而好禮事  
母以孝聞浮沉鄉社亦以教授爲事不幸早世生  
於乙未歲之孟秋歿於至元戊辰歲之仲冬望後  
八日年甫三十有四妻孟氏孀居奉養其姑撫字  
孤子閨門端肅邑人賢之縣大夫以其貞節薦於  
府庭生四子長曰并次曰林曰榮曰秀咸有乃父

風

明

中憲大夫湖廣按察司副使陳公墓誌銘

禮部左侍郎劉龍上黨人

按察司副使陳公諱璧字德如別號龍泉居士先

世有仕元爲太谷令者因家焉遂世爲太谷人父

樸菴封君少業儒性嚴毅少合義不苟取公生九

歲讀孝經卽能了句讀字意人皆異之謂樸菴曰

子之志其伸於爾子乎補邑庠生樸菴遊江湖或

經歲不歸孺人田督之手不釋卷母績子讀每共  
一燈夜分乃止年弱冠偕童師武生者歲考得食  
廩餼固以讓武事雖未果其識量亦可徵已尋同  
同志屏居鳳山下龍泉寺讀書領鄉薦繼舉進士  
授行人司司副屢使宗藩俱有清譽以光王命考  
績書最進階徵仕郎封父如其官母田爲孺人陞  
刑部員外轉郎中時逆瑾擅權法官動遭譴謫頗  
尚深刻爲迎合計公曰殺人以利己吾不忍也略  
不爲變嘗審錄多所平反終亦無他遷陝藩左叅

議會漢中搗賊之亂督餉有功爲總制彭公所薦  
賜銀牌彩幣勞之榆林將臣王勛失機朝廷遣官  
按狀時方以牽制顧望事久不決公一鞠之遂伏  
其辜衆相與嘆曰陳君固西曹老法家也甘涼之  
警供億浩繁復以彭公請奉勅督餉兼治屯田水  
利事並舉無少偏廢一以實惠及人爲主士卒感  
之如慈父然時發內帑遣使臣與守將董糴事欲  
以銀兌給意圖侵剋公堅執曰戰士貧苦以糧爲  
命此等舉錯恐非朝廷意吾當疏請乃可耳使者

懼而從之聲益藉甚一年內五被旌舉轉湖廣按察副使整飭郴桂衡永諸路兵備未幾從巡撫都御史秦公剽猺蠻克捷撫定荆襄流民遠近安之巡按御史薦於朝有公正廉約之語正德己卯丁封君憂守制遂不復起惟以耕讀課子孫暇則引親故觴咏爲樂有司事一無所干益爲鄉里重是年春偶疾家人請禱力止之曰吾祿與壽不啻足矣禱復何求但當以公服斂我見先人於地下爲不愧耳喪用家禮母作浮屠法賦詩一章有遊宦

皆成妄浮名總是空之句遂歿於正寢實嘉靖五年六月二十三日也距其生天順庚辰八月五日春秋六十有七配楊氏繼趙氏贈孺人再繼武氏封孺人子男四善道楊出治道蚤夭時道邑庠生趙出人道尚幼武出女三孫男四肇基肇業肇家肇禋女孫二卜明年二月二十五日葬城南先塋之次時道走京師持狀來乞銘予與公同舉於鄉故爲之銘曰越在宏治惟兔紀年我實與子並應賓賢厥後登科於羊於犬我幸先鳴子尋妙選時

人日子晉產之良官階屢遷孰往不臧奉使宗藩  
君命不辱其在刑曹不寃於鞫軍門總餉於襄於  
彘流民撫定薦剡交馳宜究厥施懋賞與位乃以  
憂歸遂成高致宜修厥算以儀邦人乃忽遭疾曾  
弗七旬士仰其風民懷其愛將百千年如其身在  
城南之阡山川萃精以裕爾後世有令名

陝西靜寧州判事陳君墓誌銘 趙體敬

君諱時道字行甫號鳳洲勅封徵仕郎湖廣按察  
司副使璧之子也副使公有四子君行第三初宏

治戊午春副使公偕趙孺人之京以十二月十八  
日生君君生六齡趙孺人卒繼鞠於武孺人武孺  
人卽君弟人道之生母也君幼而穎敏識者舉知  
非常人補邑庠弟子員君是時僅弱冠丙戌副使  
公邁疾不起君哀毀踰禮治喪一從治命旣襄事  
乃益勵讀書鳳山麓隆道宮而文思益進屢試不  
第以選貢赴銓司甲辰授直隸慶都縣丞丞於縣  
爲貳司馬恒見抑於其長君抗志秉節鄰邑有大  
豪因姦殺人行賂彌縫者數年矣君偵之而置於



法黠卒從軍門來持僞文支軍餉君立辨非是下  
之獄戊申陞靜寧判官管甘肅糧儲過家以母武  
孺人老不欲去武疆之勉赴任其所釐革聽斷一  
如丞慶都時撫軍重君風采嚴毅有出塞之使衆  
皆駭愕君慨然請行戒期出徼外分給農具種粒  
悉如法諸人稽首稱便肅州衛楊指揮家衆倚勢  
縱恣誣人爲盜凌陷數人垂死君悉理而活之大  
姓王惠以水利殺人以利給傭人楊奉代伏君引  
奉訊之曰殺人者死死者不可復生爾以百緡而

甘心代死耶因出之擬惠於律居官多所平反如  
此然君由此得名亦竟取忤於時以疾告歸歸則  
杜門謝賓客恒坐臥一小樓有司事一無所干出  
則攜囊挈榼徜徉於城南莊笑傲酣歌放形物外  
君美風儀性仁儉居聞諸婦撻婢則叱止之曰此  
亦人子也奚苦之自奉尚簡淡恒食未嘗兼味朝  
賀宴會每服先世舊衣帶不極敝不少寘尤好書  
籍工哦吟一有感發則形諸題咏所著有太谷縣

誌及鳳洲詩文稿河西雜稿桑陰農話前村野錄

可亭詩話藏於家享壽七十二而卒實隆慶己巳  
六月一日也君娶任氏繼龐氏子男二肇家任出  
肇禮生員龐出孫男四言謨訓諫孫女四曾孫男

一卜以卒之年十一月十五日祔葬於縣南祖塋  
之次銘曰鳳山之秀象水之清鍾靈孕美篤生哲  
人休矣元龍秦雲楚雨亦有鳳雛以永終譽位則  
弗稱政則可推官有遺愛民有去思勿畏強禦發  
奸摘伏以柔遠人孔淑不逆自西徂東綽有頌聲  
曰惟循良世食其功壽逾七十神歸安宅萬祀千

秋視此貞石

孝廉陳立甫墓誌銘

楚雄太守

張

澤

榆次人

君諱人道字立甫嘉靖甲午舉人自少器識不凡  
年方十歲善屬文十七歲補邑庠弟子員邑令崔  
公閱君文稱之曰璠璣之器非尋常有也每乘公  
暇卽召入縣署作文愈益愛重科試爲督學曹公  
首取較試畢將闔省堪以決科者取入河汾書院  
親加誨迪以彰得人之盛君得與焉是歲秋闈竟  
得高選歷壬戌凡十上公車弗第人咸諷之仕卽

整衣曰大丈夫當如海鵬待風長飛九萬里安能  
卑棲蓬蒿耶况吾父成進士歷顯官我若止此不

惟自負所學亦且有愧先人矣愈蹶愈奮常與劉  
子龍潭郭子鈍安高子南峯居別業相切磨如諸  
生時不意時命不偶賫志以歿家居三十載絕無  
一事干有司遇年饑出粟濟人族黨依以爲命事  
母委曲順志友兄弟怡怡如也淑配白氏無出再  
娶側室袁氏俱守共姜之節共勤織紵嗚呼陳君  
有高才而限於時命有厚德而靳諸子孫誰不爲

之流涕耶君生於正德癸酉八月十七日卒於嘉  
靖甲子九月十九日享年五十二歲萬曆元年二  
月二日白氏亦卒其姪肇家肇禋等共襄大事卜  
於本年四月十有二日合葬於城南先塋之次肇  
禋持狀求余銘銘曰山有靈哲人兆生岡之崇彩  
鳳高騰時之盛兮翔於千仞德之衰兮狂歌頓興  
傷鳳鳥之不至兮偶疾仙昇悼鳳雛之已矣兮陰  
騭無徵仙德輝之未泯兮照耀佳城

孝廉成見齋墓誌銘

文淵閣  
大學士 殷士儋

濟南人

嘉靖甲寅三月七日鄉貢進士成君卒距生正德

辛未十月九日僅四十有四子法卜卒之年六月

望祔窆祖塋次禮也從弟子安試政夏官方以不

及永訣爲憾無何授扶溝尹得便歸視塋又自慰

云蓋子安少時與弟守身輩皆從君授毛鄭詩其

遭外艱不克塋君傾貲爲治且甚厚子安舉己酉

守身舉壬子鄉試君喜曰叔以諸弟付我庶於叔

無負矣癸丑子安第進士君不第顧愈益喜曰吾

叔視吾弟猶我吾不第無憾矣歸出所蓄數百金

遺之且戒曰初筮仕勿苟稱貸他人貽後累數寓書責以遠大斯不忝所學故君疾也子安憂之深訃至愈哀焉君系出太谷天順間高祖淪爲大使監曹稅課遂占籍於曹君追維本始嘗自述狀因子安乞陳狀元謹表大使君墓又私譜其族欲合太谷以上爲完譜約子安共成之二事且竣而君不可起矣子安持侯進士祁狀屬余銘君墓再拜泣請曰守節賴先兄有今日先兄齋志而歿不可使後無述也按狀君諱守復字子近嘗顏所居曰



不遠復堂因自號見齋會祖傑祖昭昭三子長良

相卽君考母蔣氏生三子長卽君君幼聰穎十歲

善屬文先達奇之十四遊鄉校文行冠一時三十

與計偕五上春官不利下帷授經一時多士景從

焉性純孝侍父疾衣不解者越四旬比卒哀毀幾

絕屆禫猶餽粥尋有祖喪又以當室後祖斬苴先

後五年苦塊一室中君子以爲難服闋領庚子薦

聞報大慟人問之曰吾祖吾父不見能勿悲乎母

喜農業不樂城市居君不拂其意日與二弟從郡

中來定省以爲常歲時獻新味卽果蔬不先奉不  
入口姑氏蚤嫠自君父在時攜孤來依君置田數  
百畝給其孤並給母黨之貧者歲不問所出入其  
以志養多此類也於二弟盡友愛教以舉子業皆  
爲郡諸生從昆弟凡六人視之如一與人交重信  
義每日終身用一誠字不盡所識婚喪多藉襄事  
無德色或見負亦無愠心故人樂與親配宋氏處  
士金女子二長卽法娶郭次注聘劉孫女一尚幼  
注蚤慧君愛之往余與君同舉於鄉見其誠慤重

其人讀今狀知其孝友過人信篤行君子也曹於齊魯間號多文學至語後進矜式咸推君其所倡造彬彬有成效矣乃君顧不第竟不獲一命以死豈非數耶余觀子安溫文雅飭遠到未可量惓惓圖不朽其兄者無不至焉君臨終語諸弟曰吾志有託目可瞑矣語子安也嗟乎有弟如子安君爲不死哉銘曰君不負爾叔弟忍負君餘祉不可垠胡悲乎無聞庶於茲墳

亞中大夫四川布政司右叅政趙公墓誌銘

倉場 尚書 褚 鈇 榆次人

余讀漢史見黃次公守潁川力行教化用法寬和吏民愛敬宣帝下詔稱揚賜爵關內侯竊忻慕之以為古今人不相及矣今觀立齋趙公始自使職而轉郎官繼以郡守而叅方伯歷仕三朝履正奉公兩蒙誥勅褒美中以通敏勤慎學道愛人奉公潔已為稱皆殊常之寵也既以謝病歸里民猶刻石寄思其獲上得民視次公豈多讓耶按狀公諱體敬字克禮別號立齋世為太谷在城坊人曾祖

仲芳有隱德不仕父清正直忠厚言行侃侃爲鄉

邦推重以公貴初贈承德郎兵部武庫司主事加

贈中憲大夫直隸鳳陽府知府母段氏邑耆勉學

女貞慈端重儉約勤慎治家有法先贈安人又加

贈恭人生公甫七歲贈公口授以小學四書日誦

千百言不復遺忘十三補邑庠弟子員卽以禮法

自繩不爲習俗所移爲文雄渾藻麗嘉靖壬子舉

於鄉壬戌登進士第觀政吏部癸亥授行人司奉

世宗皇帝命使徽藩冊封再使韓藩祭墓二藩以

命使咸厚爲餽遺公悉峻卻不受其筮仕清介如  
此出使所至必諮諏軍民利病居常談古昔與當  
世之務歷歷如指諸掌隆慶丁卯穆宗皇帝登極  
陞兵部武庫司主事尋陞員外郎又三載陞本部  
車駕司郎中舊時同舍郎一掌篆輒以勘符假人  
驛遞騷擾公曰一夫一馬皆小民膏脂也源之不  
防末流何禦乃嚴覈冒濫力辭請求夙弊爲之一  
清監收太僕寺馬價出納有經民皆便之大有聲  
於郎署中萬厯初擢爲直隸鳳陽府知府公下車

首飭皇陵園廟次則問民疾苦輕徭役省獄訟每  
歲錢穀出納不下數十萬支解悉以原封羨餘纖  
毫不染往太守入覲夫馬館穀皆備自各屬公知  
之乃曰府中自有常祿不可以道里費累人且已  
之不清又何以責人六載兩朝盡嚴拒不用屬吏  
莫不畏懾俗素奢侈好逐末不知耕耨土地荒蕪  
凶年每致困乏公乃身先儉約勸民耕稼力田荒  
蕪歲開闢百姓充裕當是時江陵入秉政多以法  
把持天下俗吏慕效爭嚴酷以爲能公獨尚寬和

馭吏先禁諭而後斥逐治民急教導而緩刑罰務在成就安全與民休息由是上下信孚吏無姦邪獄無冤濫盜賊不起其他善政未可殫述自萬歷來海內稱循良者率以公爲首先是中都守多以不職論去公歷任六年兩考課績居各郡先超遷四川布政司右叅政督理糧儲濱行送者數千人皆攀號不忍舍去後郡人思公不已復刻石頌德焉抵蜀未幾以溼疾艱於步遂上疏乞歸旣歸閉門謝客不干有司不爲子孫營財產恂恂如布衣



不以官爵驕人天性孝友母段恭人有疾公親嘗  
湯藥忘寢食者數月中夜焚香告天願以身代母  
尋愈事叔典膳公秀敬畏如父處弟體恭曲盡友

愛終無間言撫子姪有恩待媼族有禮鄉黨中五  
尺之童罔不愛敬卒之日邑人無長幼親疎咸痛  
悼曰彼蒼者天何奪我善人之速也公生於正德

十六年十二月二十三日卒於萬曆十三年十一  
月二十四日享年六十有五配吳氏封安人又封  
恭人孝敬慈惠克修婦職復娶側室申氏亦有賢

德子男三長謨國子生次誨邑庠生次讓尚幼女  
一孫男四孟龍孟鸞孟鶴皆謨出其孟麟則誨出  
也孫女二將以萬曆十四年七月二十七日葬公  
於城東祖塋之次先期請銘於余銘曰於惟趙公  
間世之英飽飫經濟博大宏深筮仕使垣不辱有  
恥佐政夏官奉法循理擢守中都獨尚寬和正己  
率屬不縱不苛薦牘交升聖心嘉悅六載政成晉  
叅方伯知足知止告歸山林急流勇退高節完名  
允矣善人展也循吏我銘諸石昭示後世

河南商河縣知縣高公墓誌銘 褚 鈇

公諱擢字子秀號午山世爲太谷正西一里人高祖德輝曾祖鵬選祖贊世有醇德父仲嶓以文無害起家先爲文登寧津倉大使繼爲黃岡窰步安仁湖所官皆有能聲居家正直忠厚好善樂施鄉人至今稱之母冉氏生公穎悟非常幼習舉子業日誦數萬言年十八補邑庠弟子員博學雄文每試輒首嘉靖壬子與同邑趙公體敬並舉於鄉而公天資獨高人尤推讓之後趙成進士官大叅而

公十二上春官終未遇萬厯己丑謁選得知河南  
商河縣抵任甫三四日出淹獄二十餘人邑之民  
懽若更生有舊案數千起久不結公傾家所攜五  
十餘金代貧民償罪於是案牘一清士民咸稱慈  
惠焉未浹旬值齏使按部公冒暑走謁百里外且  
以簿書案牘爲勞乃曰禮七十致仕今若此是尚  
可戀升斗乎卽日乞休上官知公廉能不許公復  
面懇曰古人量力而仕今七十有二非膂力方剛  
時也不去終恐負蒼生速官謗請再三乃允歸之

日人罔不服其高惜其去也又三年得肺病臥榻  
三月餘一旦呼家人索冠巾沐浴更衣從容整暇  
而逝初公志用世閉門謝客讀書求實用迨久不  
第始置腴田建廣廈以詩酒友朋爲娛樂晚年倦  
倦濟人利物人有挽小車鬻器者爲巖牆所覆人  
器兩傷公償其值仍推食食之故人子李生貧甚  
公見而憐之與粟帛金錢萬厯丙戌歲大饑民待  
哺者填溢街衢公計日給穀全活不可勝數復收  
養闔邑丐兒寒與衣饑與食歲以爲常仍以穀百

石上倉濟有司之急大尹張公請上官樹坊表之  
公曰吾憐饑民而助賑豈好名耶固辭而止每遇  
縲絏之夫踵門而求卽量罪輕重給銀粟以輸官  
人有私債急而鬻子女者悉爲贖還之公生平倜  
儻與人豈弟和易經史子集過目輒成誦爲詩文  
鏗鏘蘊藉雅稱作家配陳氏前憲副壁之女治家  
勤儉事舅姑以孝接親族以禮馭童僕嚴而有恩  
先公二十五年卒又娶成氏子男二長甲邑廩生  
年二十二卒娶王氏有賢德先甲二年卒次應兒

蚤夭女一公生於正德戊寅十一月二十一日卒

於萬曆壬辰四月初五日享年七十有五孺人生  
與公同卒在隆慶戊辰享年五十有一嗚呼公雖  
未第而以富壽終任雖未幾而以廉能稱固足垂  
休後世矣惜子有決科之才不壽孺人又以慟子  
之故喪生則其情有可悲者經歷有六子內四人  
以儒顯公視六人猶子而六人皆以父視之將來  
紹箕裘而大門閭者固不必自己出也故叙其事  
而爲之銘銘曰吁嗟高公幼享大名垂老而令惠

大各縣志 卷一  
溥編氓其惟孺人理家克成積而能散邦有頌聲  
堅珉是載不朽而榮

國朝

平涼府固原州同知武君墓誌銘

進士

戴運昌

祁縣人

君諱國清字醇熙號靜寰世爲太谷正西二坊人  
生而穎異未弱冠補邑庠弟子員每試居優等十  
入秋闈三中副車遇而不遇遂筮仕東平州同知  
州舊有漕河壅滯君疏通漕運設法徵完兩年漕



米又調理鹽法捕獲私鹽無算充公費不取秋毫  
遇年荒民凍餒死者無數捐俸瘞屍其他善政不  
可枚舉上官知其廉能方欲題薦奉文裁汰旋里  
數月復補陝西平涼府固原州同知甫下車會軍  
門勦寇委造矢三萬未一月而報竣遂委署鎮原  
縣履任九日軍門發降丁王老虎等二萬七千餘  
人三日內安插在城未幾賊破西安被執逼就僞  
官公不從批破三晉始脫身抵舍居東山破窰一  
席橫門貧困益甚公略不動心迨

國朝受命詔求遺逸邑令韓公議薦君謝以老病自是優游林下詩書自娛無意人間事矣邑令戴公延爲鄉賓用光大典鄉人矜式焉君少貧以授經爲業玉成多士右方伯張公聞而慕之敦請訓二子君教法詳明二子學業大就張厚禮之後宦歸再設科聚生徒數十人日據案講說書義舌敝毫禿不倦將沒晨起與諸生講書畢未逾時安坐而逝無異于朱子臨終三日仍講太極圖說也爲學以理爲宗體認書旨爲文清真簡遠有先輩大家

之風幼失母每讀蓼莪諸什潸然流涕中喪父哀

毀骨立治喪不用浮屠一遵晦翁家禮處鄉黨謙

卑遜順喜怒不形於色教子一本義方長子象乾

博士弟子員因罵賊刳首以死乾三子亦死秉忠

義之教也君配郭氏生三子長卽象乾次體乾次

配乾生於萬曆丙寅卒於順治壬辰享年六十三

歲二子殯君與郭氏合葬祖塋之次請余爲銘銘

曰卓哉武君學效朱程三列乙榜文雅斌斌數奇

不遇薄宦銷沈初仕東魯漕運疏通澤及枯骨鹽

法調停再遷秦地安插降丁赤眉爲寇黑山入營  
將署僞官誓死罔從壁立大節人擬子卿隱居教  
授桃李盈門臨終講習考亭流風諸徒禮葬號泣  
失聲存無餘粟歿有餘榮稽公顛末鑑此鐫文

文學武君墓誌銘

太原王秉乘順天  
司李人

君諱昌齡字萬祺太谷正西二坊人曾大父諱九  
通有隱德大父諱兢由庠生授晉藩奉祀考維周  
字二南中明天啟甲子鄉榜授平舒令捍城捐軀  
贈光祿寺少卿子二長鼎庠生次卽君隨任赴舒

會兵臨城圍困月餘光祿臥薪嘗膽夙夜劬勞他  
邑皆陷孤城獨存致嬰疾卒棺外無長物靈前有  
菜羹蕭條冷落有海忠介風公寢苦枕塊哀毀幾  
殞後赴都繕疏表忠致賜恤資二十金配享三忠  
祠入鄉賢祠父忠克顯子孝殫矣於宅旁建祠三  
楹名罔極臺門樓外樹綽楔俾子若孫祀世罔艾  
余始至太原輒展禮祠下檉楠几筵見聞僂肅光  
祿公形聲如在其上君含涕無語哀感動容其至  
性有過人者君生平慷慨激烈負氣敢言邑有大

利害事關元元身家性命諸紳衿所口噤不敢言者公特向有司論列是非不顧忌諱不則控訴臺司痛哭流涕務興除而後已或貧生爲富豪凌侮訟諸守令氣餒力弱不能上達公必代爲剖白痛逾切身誠邦之義士也至勤以治家儉以律躬嚴課諸子特其餘行耳享壽七十配李氏徐溝人貞靜幽閒享年五十二歲生子三而文而斌振聲俱庠生孫捷武舉銘曰考誕孝子以表孤忠三忠配享鄉賢肇禋祠堂鼎建俎豆時新邑有利害關切

民生侃侃上言奮不顧身浩然義氣形亡心存貞  
珉垂後仰止高風

封宣武將軍侯君墓誌銘

孝廉

王

勛

孟邑人

君諱重輝字映霞號斗瞻處士生而仁孝有夙慧  
美鬚髯甫弱冠由邑庠弟子員入太學祭酒徐公  
雅敬重之嘗謂君曰以子之才品學問服官迎刃  
有餘也若由教習考中書五年之內可以墨綬君  
曰高堂日暮晨夕無人棄親入官寧不爲李令伯  
之罪人乎力辭不就徐公益敬重之自是僻處林

泉東山遂老謝公之跡矣其居鄉也恭讓醇篤未嘗賢智先人爲人排難解紛凡里中有鼠牙雀角之爭得君一言彼此感愧而釋時人有仲連彥方之譽云康熙二十三年秋霖雨四十餘日鄉中乏食者以百餘計君罄家所有徧給均周窮簷困厄俱蒙實惠烏馬含沙秋冬病涉君捐資建梁每歲率以爲常他若施棺毀券返帶還金善行在人耳目間者班班可考也於康熙五十三年

榮封宣武將軍卽於是年誕五代元孫享壽八十有三



卒於辛丑歲之六月原配恭人白太君先君而逝  
生子五長化虞由庠入監次化芮領癸酉鄉薦次  
化鄰與芮同榜以守備管遼州營事次化成丙戌  
進士次化宣辛卯亞魁女三孫十二帝賚癸巳鄉  
薦帝輔歲貢帝依太學生帝寵帝愷郡庠生帝錫  
甲辰鄉薦帝佐邑庠生帝元帝夔帝簡帝肱帝昇  
重孫十五戎甲辰鄉薦桓穀服鎮企勛礪鄴紱絳  
紘綖綬漢復元孫五壯武壯猷壯圖壯履壯觀茲  
當歸窀之日請銘於余余於君年家子也義不容

以不文辭因叙其生奉而爲之銘曰天馬之行空  
兮遽萃於此瑞氣氤氳兮鳳山秀起微高賢之凝  
承兮孰受其祉蘊千秋之靈脈兮祥發伊始卜吉  
壤之綿延兮曷其有已天之所以報施善人兮永  
斯藏而寧止

處士武公兩臣墓誌銘

翰林院  
檢討

王

珣

孟縣  
人

不士其服而士其行身不事士之業而身之前後  
悉賴身以卒其業如武公兩臣其人可進於儒者  
之林無愧也公諱召兩臣其字世爲太谷人不詳

所自徒自公考增廣博士弟子員諱際甲以詩書  
肇厥家公兄候選教諭諱周以明經祭酒藝林邑  
人言書香者推武氏公少留心帖括窺大意緣家  
計徙業遂荷家政用上弛增廣公之肩而司諭公  
因得專志下帷課訓子姪公之長子曰揚與姪曰  
敬皆從學焉曰揚與曰敬同時遊黌序甲辰歲督  
學使劉公送兩人至三立書院從余受業曰揚文  
日益有聲一時書院能文之士無能過之者自中  
丞方伯以下交口器曰揚而曰揚竟以數奇不得

售至甲寅科始以選拔貢成均公且喜且勉曰吾不以是竟爾程也乃期許方銳不數月而公已歿嗚呼可哀也已公性至孝事增廣公與母劉氏生死盡禮尤篤於同氣有姪曰直以南漕揀選協運浙江台州衛後幫卒任所子幼不能奔喪公與曰敬經營還柩得葬身居闐闐幾五十載恂恂有讀書氣邑中行鄉飲酒禮欲舉公公曰鄉飲大典也膺此選者當如洛下耆英余何敢辱茲典固辭不肯就人愈以此高之今日揚持行述來請志於余

余不敢溢一言有諛詞故志公之梗概如此公生於康熙元年十一月十四日卒於雍正十三年二月初八日享年七十有四元配吳氏先公卒生子三長曰揚甲寅拔貢生次曰毅次曰吉女二孫男五長述揚出次恂毅出次卓揚出次弼次度吉出孫女八曾孫男二今以九月初十日卜葬於城西賀家堡之原而孺人吳氏祔焉爲之銘曰公志在學公行可士胡初服之不遂而竟布衣以死上成父兄之志而下以詩書惠其子青雲紫誥不於公

之身而於公是始嗚呼公其鄉之砥

車孝廉相賢墓誌銘

邑令

向

嵐

溆浦人

余蒞任谷邑諮訪懿行於武孝廉中得一人曰車君相賢相賢以事赴都家報至聞母病痛哭恨不欲生呼天禱曰苟得見母面願以身代於是廢寢食兼程就道時其母病已劇家人已備賻殮具矣相賢歸晨夕侍床畔不數日母病以愈而相賢旋溘逝嗚呼其卽所禱以身代者歟一念之精誠至於感蒼旻通神明宜若可鑒其孝思者而又何責

報之速歟余異其事其姪貢士曰履忠者又前致  
詞曰叔之可傳者不獨在孝平日耿介不苟是其  
廉也然諾不欺是其俠也矜孤恤寡是其仁也他  
如敦友于睦婣黨慎交遊歷歷難更僕數而至於  
幼攻書史長習韜鈴雖未獲登甲第以賢書終而  
其居心制行卽儒者奚及焉余曰微子言余亦知  
有必然者蓋孝爲百行之原未有其人孝焉而猶  
不見齒於鄉黨朋友且未有孝焉而德業猶弗端  
事功猶弗懋者也今其長子履仁傷父之歿而恐

其無傳乞余叙而銘之余惟卽其質實處以傳之  
不朽云爾君諱相賢字介臣康熙甲午科武舉人  
生康熙二十七年六月初八日卒乾隆九年十二  
月初五日年五十有七元配石氏繼配武氏子四  
長履仁次履義俱太學生石氏出次履智次履信  
俱太學生武氏出墓在桃園堡西南之原銘曰報  
本爲大千里顛天捐軀代母母病以痊干城之選  
砥礪之賢傳之永久佳城鬱然

封中憲太夫湖廣道監察御史兼掌河南道監



察御史禮園孟公墓誌銘

朱

珪

大興人

孟之先自陝西固原元明之交遷太原之太谷蕃  
於山西十三傳至鴻品生庠生熙皆以御史生蕙  
貴

誥贈中憲大夫朝議大夫熙娶武恭人生子三封君其  
長也諱啟周字寧魯號禮園少讀書及長代其父  
任家事以勤苦起業友於兩弟而教其子獨嚴初  
孟氏祖居宅三百餘年矣後有樓數楹將圯不克  
修君日考作室弗堂弗構可乎此吾祖吾父之志

也獨力修之以爲先人專祠仲子生蕙癸未成進士授職編修君之父以諸生屢困場屋至是猶及見之已而生蕙官吏部文選司員外郎授湖廣道監察御史加二級君以辛卯丁酉

誥封奉政大夫

晉封朝議大夫如其子官季子生草戊戌成進士己亥生蕙充雲南副主考官君年六十有五矣夙興治家政秩如也明年庚子春恭遇

萬壽覃恩中外官皆加一級君得

晉封中憲大夫仲夏晦以疾卒於邸配吳恭人男子子  
四長生蕢先卒次生蕙掌湖廣道監察御史加三  
級次文蔚分發浙江府經歷其季生草候選知縣  
女子子三孫男十人毓紀國學生生蕢出毓綱毓  
緒毓緯毓縉皆文蔚出毓綸毓紱毓紋皆生草出  
毓綬毓純毓勳皆生蕙出女孫八人乾隆四十七  
年二月十一日葬於城東孟家村生草戊戌分校  
所薦士也偕其兄生蕙請銘銘曰巋然發室祀厥  
祖菴然式穀大其戶鳳山象水藏千古